

# Osvrt na 2014. godinu

## UVODNIK

### Ispravljena velika nepravda

24. juli 2014. godine – veoma značajan dan za Kakanj. Ispravljena je velika nepravda! Građani Kaknja decenijama nisu imali ni minimalnu satisfakciju zbog velike zagađenosti koja nastaje u procesu proizvodnje električne energije. Nada da može biti drugačije oživjela je prošle godine kada je pokrenuta inicijativa da termoelektrane dio svojih prihoda usmjeravaju općinama u kojima imaju svoje proizvodne kapacitete. U jakoj sinergiji Tuzle i Kaknja započela je odlučna borba da se ispravi nepravda koja ima dvostruki karakter. Sa jedne strane općine na čijem području se nalaze termoelektrane decenijama nisu imale adekvatnu nadoknadu zbog zagađenja, a sa druge strane stavljene su u neravnopravan tretman u odnosu na općine koje imaju hidroakumulacije na svom području na osnovu čega ostvaruju prihode.

24. jula 2014. godine, nakon Doma naroda, i u Predstavničkom domu Parlamenta F BiH je usvojen Zakon o izdvajanju i usmjeravanju dijela prihoda preduzeća ostvarenih radom termoelektrana. Na osnovu usvojenog zakona, Općina Kakanj će na godišnjem nivou ostvarivati dobit od oko 3.000.000 KM. Ova sredstva će značajno utjecati na poboljšanje kvaliteta života jer će nova tri miliona godišnje u Budžetu Općine Kakanj omogućiti lokalnoj zajednici da sama realizira značajne projekte umjesto dosadašnje prakse stalnog iščekivanja na sredstva viših nivoa vlasti, sredstava koja obično nisu dolazila ili su konstantno umanjivana.

Primjena pomenutih zakonskih odredbi počinje 1. januara 2015. godine.

## FINANSIJE

### Općina Kakanj svijetli primjer uspješnog budžetskog poslovanja u 2014. godini

Bez obzira na brojne poteškoće koje se ogledaju u smanjenju priliva sredstava sa viših nivoa vlasti, Općina Kakanj je tokom 2014. godine uspjela ostvariti stabilizaciju Budžeta, te redovno izvršavati svoje obaveze, što je rezultat kontinuirane štednje, racionalne potrošnje i vrhunskog angažmana općinske izvršne vlasti u ostvarenju vlastitih općinskih prihoda.

Očekivana realizacija Budžeta Općine Kakanj za 2014. godinu je oko **18.000.000 KM** i **veća je za 48 %** u odnosu na 2013. godinu. Kapitalni transferi i kapitalni izdaci čine **31,7 %** Budžeta Općine Kakanj što je izuzetno veliki procenat. Zbir kapitalnih transfera i kapitalnih izdataka iznosi **6.214.174 KM**.

U ukupnom prihodu Budžeta Općine Kakanj učešće neporeznih prihoda i vlastitih prihoda je **26,7 %**. Radi se o iznosu koji je znatno veći u odnosu na budžete općina u okruženju i šire. **Ovaj iznos je pokazatelj vrhunskog angažmana općinske izvršne vlasti u ostvarenju vlastitih prihoda Općine Kakanj.**

Sve glavne prioritete u rashodima Općina Kakanj je realizirala. U potpunosti su realizirana socijalna davanja, redovno su isplaćene stipendije za učenike i studente, redovno se izvršavaju obaveze u pogledu stimulativnog zapošljavanja pripavnika...

U 2015. godini očekuje se novi prihod u Budžetu Općine Kakanj koji će iznositi oko **3.000.000 KM** namjenskih sredstava od prihoda Termoelektrane Kakanj tako da je ukupan iznos ovogodišnjeg Prijedloga Budžeta Općine Kakanj **21.679.527,23 KM**.

## **INVESTICIJE, PODUZETNIŠTVO, PODSTICAJI**

### **Otvorena novoizgrađena fabrika madraca “Moj san”**

Kakanj je jedna od rijetkih sredina u BiH u kojoj se razvija poduzetnička inicijativa, grade nove fabrike i novi proizvodni pogoni. “Od Dana nezavisnosti do Dana državnosti”, u najkraćem bi se mogao opisati period izgradnje nove fabrike kakanjske firme “Delibašić poliuretani” koja je 26. novembra 2014. godine svečano otvorena u naselju Čatići, u blizini Separacije Rudnika mrkog uglja Kakanj. Vrijednost investicije je 1,5 miliona KM, firma zapošljavanja 50 radnika, a ove godine zaposleno je novih 15 radnika. Radi se o prvoj razvojnoj fazi firme “Delibašić poliuretani”. Novoizgrađena fabrika se prostire na 2.500 metara kvadratnih. Radi se o investiciji koja je u dosluhu sa općim nastojanjima Općine Kakanj da kroz brojne olakšice stimuliše izgradnju novih proizvodnih pogona što rezultira i novim zapošljavanjima.

### **U Kaknju uskoro izgradnja proizvodnih pogona za preradu nusproizvoda životinjskog porijekla**

U Kaknju je u 2014. godini osnovana firma “Bioorganika” koja će graditi postrojenja za preradu nusproizvoda životinjskog porijekla po evropskim ekološkim standardima (investicija firme “Agroproteinka” Zagreb). Krajem jula tekuće godine u Kaknju je održana javna rasprava u cilju ocjene Studije o procjeni utjecaja na okoliš u postupku izdavanja okolišne dozvole za izgradnju tvornice za preradu nusproizvoda životinjskog porijekla na lokaciji „Bilješevo“ (na nenaseljenom prostoru uz autocestu, na suprotnoj strani od Modrinja). Postupak dobijanja okolinske dozvole je u završnoj fazi tako da se uskoro može očekivati izgradnja proizvodnih pogona.

U 2014. godini, kakanjsko preduzeće “Trgošped” je počelo sa izgradnjom svojih poslovnih objekata na lokacijama Poduzetničke zone “Vrtlište” u Kaknju.

### **Realizirane brojne poticajne mjere za pokretanje i razvoj malog i srednjeg poduzetništva**

U svrhu podsticaja razvoju poduzetništva i obrta u 2014. godini Općina Kakanj je utrošila **91. 145,66 KM**. Ovom iznosu treba pridodati i pomoć u iznosu od **14.000 KM** koju je za istu svrhu Kaknju dodijelila Humanitarna organizacija “World Vision BiH”.

Kroz projekat „Pokreni svoj posao u Kaknju“ 9 nezaposlenih aplikanata koji su registrirali djelatnost dobilo je općinske novčane podsticaje, a kroz projekat “Proširi svoj posao u Kaknju” novčanu pomoć je dobilo 5 pravnih lica.

Općinski novčani podsticaj namijenjeni za refundaciju troškova za osnivanje obrtničkih, trgovačkih i ugostiteljskih radnji i dijela troškova osnivanja preduzeća – d.o.o. u 2014. godini dobilo je 16 fizičkih i 3 pravna lica.

Poduzetnicima iz Kaknja Općina je pomogla i kroz plaćanje zakupa prostora i finansiranje prevoza radi predstavljanja na sajmovima privrede, zanatstva i roba široke potrošnje.

Uporno, kontinuirano i svesrdno zalaganje Općine Kakanj na unapređenju i poboljšanju ambijenta za poduzetničku djelatnost postalo je prepoznatljivo obilježje ove lokalne zajednice.

**Općinskih podsticaji u poljoprivredi: 129.569 KM, 15 steonih krava, 104 ovce, 101 koza, 10 junica, motokultivatori, 24.360 kg stočne hrane, 41.640 kg sijena...**

U 2014. godini Općina Kakanj je izvršila dodjelu **15 steonih krava**. Krave su dodijeljene osobama koje su pravo na ovu vrstu općinskog podsticaja ostvarile kroz proceduru javnog poziva u skladu sa kriterijima i u saradnji sa Savezom boračkih udruženja općine Kakanj.

U okviru realizacije projekta Njemačke nevladine organizacije "Help" i Općine Kakanj, tokom 2014. godine građanima Kaknja dodjeljivana je poljoprivredna mehanizacija i alati za obrt (**traktori, muzilice, plastenici, oprema za zanatske radnje...**). Nabavku poljoprivredne mehanizacije i ostalih sredstava za razvoj poduzetništva finansiraju Njemačka nevladina organizacija "Help" sa iznosom od 55 %, Općina Kakanj iznosom od 30 %, te sami korisnici učešćem od 15 %.

Za podsticaje u oblasti poljoprivrede Općina Kakanj je u 2014. godini utrošila **129.569,19 KM**. Podsticaji su realizirani u animalnoj proizvodnji (mlijeko, pčelarstvo), biljnoj proizvodnji (plastička i obrada zemljišta), te u oblasti otkupa poljoprivrednih proizvoda.

Ukupan broj poljoprivrednih proizvođača koji su ostvarili općinski podsticaj iznosi **370**.

U IV kvartalu 2014. godine otkupljeno je ukupno **94.441 litara mlijeka**, što je rekordan iznos otkupljenog mlijeka u Kaknju u jednom kvartalu promatrajući sve poslijeratne godine.

Poljoprivrednim proizvođačima iz Kaknja Općina Kakanj je pomogla i kroz plaćanje troškova zakupa prostora i prevoza u svrhu njihovog predstavljanja na sajmovima organske i poljoprivredne proizvodnje.

Odsjek za lokalni ekonomski razvoj je realizirao 9 teorijskih i praktičnih edukacija za poljoprivredne proizvođače kojima je prisustvovalo oko 600 poljoprivrednih proizvođača.

U Registar poljoprivrednih gazdinstava, uz **378** ranije evidentiranih, upisano je **novih 150 poljoprivrednih proizvođača**.

Općinski službenici koji su zaduženi za razvoj oblasti poljoprivrede zabilježili su **3.325 prijema** osoba koje su se interesirale za pitanja iz domene poljoprivrede.

Tokom 2014. godine domaćinstvima iz Kaknja kod kojih su zabilježene štete u poljoprivredi nastale usljed prirodne nesreće iz maja tekuće godine, dodijeljeno je, ili će uskoro biti dodijeljeno, 3.000 kg sjemenske pšenice, 3.500 kg sjemenskog luka, 60 kg sjemena špinata, 1.400 vrećica salate, 9.320 kg mineralnog đubriva, 16.000 sadnica jagodičastog voća, 104 ovce, 20 ovnova, 101 koza, 20 jaraca, jedno tele, jedan konj, 24 košnice pčela, 24.360 kg stočne koncentrovane hrane, 41.640 kg sijena, jedna svinja, 10 junica, 172 koke nesilice, 100 tovnih pilića, 2 patke i 6 zečeva.

Vrijednost dodijeljene pomoći je **112.000,00 KM**. Ovu veoma značajnu pomoć kakanjskim domaćinstvima obezbijedila je Austrijska razvojna agencija „ADA“, a projekat pomoći se realizira preko Humanitarne organizacije „World Vision BiH“, te u partnerstvu sa Općinom Kakanj.

# INFRASTRUKTURA

## Ulaganja u vodovode i kanalizacione mreže

Ukupna ulaganja u izgradnju vodovoda, kanalizacionih mreža i općenito hidrotehničkih objekata na području općine Kakanj u 2014. godini iznose **1.667.096,25 KM**.

U izgradnju i rekonstrukciju vodovoda uloženo je ukupno **502.685,87 KM**. Izdvajamo nekoliko projekata: izgradnja vodovoda Javor (34.028,28 KM), izgradnja vodovoda Koprivnica, vodovod "Dumanac 2" (49.946,27 KM), izgradnja vodovoda "Varalići" (95.113,89 KM)...

Za izgradnju kanalizacionih mreža u 2014. godinu u Kakanju je utrošeno **338.531,74 KM**. Izdvajamo nekoliko projekata: izgradnja fekalne kanalizacije za Poduzetničku zonu "Vrtlište" (65.065,25 KM), izgradnja kanalizacije "Obre-Polje" (49.572,51 KM), izgradnja kanalizacije "Crnač" (29.098,38 KM), izgradnja kanalizacije "Modrinje" (41.052,95 KM), izgradnja kanalizacije u Brnju (77.764,20 KM)...

U 2014. godini uređeno je novih 67 metara desne obale rijeke Bosne, nizvodno od ušća Zgošće. Ukupna vrijednost radova iznosila je 153.520,02 KM.

U toku je realizacija ili će uskoro biti realizirano još nekoliko važnih projekata: čišćenje korita rijeke Bosne (155.000 KM), uređenje lijeve obale rijeke Bosne nizvodno od Mosta mladih (90.000 KM), sanacija dijela kanalizacione mreže u naselju Pope (5.199, HO "World Vision").

Uskoro će uslijediti i realizacija još nekoliko ugovorenih poslova. Radi se o sljedećim projektima: izgradnja mosta Zgošća (51.753,55 KM, UNDP), rekonstrukcija kanalizacije Pope-Malješ (16.834,42 KM, UNDP), lokalni vodovod "Hrastovac" – I faza (36.828,21 KM), vodovod Dumanac (19.459,56 KM), kanalizacija "Papratnica" (41.985,17 KM)...

## Više od 800.000 KM ulaganja u putnu infrastrukturu

Tokom 2014. godine u sanaciju i izgradnju puteva na području općine Kakanj uloženo je **630.275,34 KM**. Izdvajamo nekoliko projekata: sanacija puteva u naselju Varda (izdvojeno oko 100.000 KM), rekonstrukcija puta prema naselju Bare (56.689,11 KM), rekonstrukcija saobraćajnica u naselju Termoelektrana (85.759,27 KM), rekonstrukcija puta u Koprivnici (57.423,95 KM), asfaltiranje puta u naselju Polje-Papratnica (54.576 KM), izgradnja potpornih zidova u Dubovom Brdu (49.457,20 KM)...

Za ljetno održavanje puteva koji su u nadležnosti Općine Kakanj izdvojeno je **198.376 KM**.

Zbir ukupnih ulaganja u putnu infrastrukturu iznosi **828.651,34 KM**.

Za izgradnju javne rasvjete izdvojeno je **90.833,54 KM**.

Tokom 2014. godine izvršeno je **proširenje i asfaltiranje parking-prostora kod solitera 1**. U cilju proširenja izvršeno je uklanjanje bespravno postavljenih garaža. Parking-prostor je uređen i na prostoru koji se nalazi ispod Slastičarne "Egipat". Nova parking mjesta Kakanj će dobiti i izgradnjom zgrade Općine Kakanj u čijim će podzemnim prostorijama biti **52 mjesta za parkiranje**.

# EKOLOGIJA

## **Općina Kakanj odlučna u namjeri da osigura visok nivo komunalne higijene na području cijele općine**

Općina Kakanj i JP "Vodokom" Kakanj svakodnevno realiziraju aktivnosti na proširenju mreže sistema prikupljanja i odvoza otpada na teritoriji općine Kakanj. Jedna od aktivnosti je i nabavka vozila za odvoz smeća. Na lokalitetu Gradske deponije u Kaknju nedavno je predstavljen novi višenamjenski kamion-kiper marke "Iveco". U svrhu nabavke ovog kamiona koji će služiti za odvoz smeća iz novih 5 kakanjskih mjesnih zajednica koje će biti uključene u sistem organiziranog odvoza otpada, ali i za čišćenje saobraćajnica od snijega, Općina Kakanj je utrošila novčani iznos od **188.124,30 KM** (sa uračunatim PDV-om).

Općina Kakanj je odlučna u namjeri da osigura visok nivo komunalne higijene na području cijele općine. Realizacijom projekta „Integralno upravljanje komunalnim otpadom na području Kaknja“ planirano je da se organizirano odvoženje otpada proširi na ukupno 11 novih mjesnih zajednica, uz 19 mjesnih zajednica u kojima već postoji organizirani odvoz smeća. Tako će sistem prikupljanja otpada nakon proširenja pokrivati 85 % od ukupnog broja stanovnika Kaknja. Planirano je da se narednih godina još povećava opseg odvoza otpada i da u konačnici obuhvati svih 37 kakanjskih mjesnih zajednica.

Od planiranih 11 novih mjesnih zajednica u sistemu odvoza otpada, već su dvije uključene. To su mjesne zajednice Ričica i Tršće, a nabavkom novog vozila omogućeno je uvođenje odvoza otpada iz još 5 mjesnih zajednica. Ostale mjesne zajednice će biti uključene u sistem odvoza otpada nakon nabavke još jednog kamiona za sakupljanje, sabijanje i transport komunalnog otpada čija se isporuka očekuje uskoro. Za nabavku ovog kamiona Općina Kakanj je izdvojila **175.498,83 KM**.

Zamisao je da se smeće sa područja cijele općine Kakanj dovozi do gradske deponije gdje bi se vršile pripreme za reciklažu čime bi lokalna zajednica ostvarivala određenu dobit, nakon čega bi slijedio odvoz neiskoristivog dijela do regionalne deponije Moščanica ili zbrinjavanje na drugi adekvatan način.

U okviru realizacije projekta „Integralno upravljanje komunalnim otpadom na području Kaknja“ nedavno su na nekoliko lokacija u gradu postavljeni **namjenski kontejneri za selektivno prikupljanje**.

## **Općina Kakanj – pionir i lider u uspostavi vlastitog i od privrede nezavisnog mjerenja kvaliteta zraka**

Odsjek za zaštitu okoline Općine Kakanj pomoću vlastite mobilne monitoring stanice kontinuirano prati kvalitet zraka u Kaknju kako bi se, u slučaju potrebe, poduzele mjere na zaštiti zdravlja stanovništva. Praksa mjerenja kvaliteta zraka vlastitom mobilnom stanicom u Kaknju se primjenjuje već nekoliko godina. Ukoliko se putem mobilne monitoring stanice zabilježi prekomjerna zagađenost zraka, uz istovremeno uspostavljenu stabilnu vremensku situaciju koja je karakteristična po sporom pomjeranju atmosferskog pritiska, slabom vjetru i pojačanoj temperaturnoj inverziji koja bi se mogla zadržati u narednih 48 sati, Operativni štab Općine Kakanj za primjenu Plana interventnih mjera u slučajevima prekomjerne zagađenosti zraka će proglasiti jednu od epizoda. Epizode koje Operativni štab može proglasiti su PRIPRAVNOST, UPOZORENJE i UZBUNA.

Podatke o kvaliteti zraka Odsjek za zaštitu okoline objavljuje na službenoj web-stranici Općine Kakanj [www.kakanj.gov.ba](http://www.kakanj.gov.ba), tako da su podaci svakodnevno dostupni građanima, novinarima, eko-udruženjima i svim drugim zainteresiranim subjektima. Ovi podaci se u sažetom obliku objavljuju u programima NTV IC Kakanj i internog kanala kablovske televizije.

## **Kontinuirane aktivnosti na proširenju mreže daljinskog grijanja**

Tokom 2014. godine u MZ Kakanj II je realiziran projekat proširenja sistema daljinskog grijanja u MZ Kakanj II. Radi se o projektu ukupne vrijednosti **815.634,50 KM**. Izvođenje radova finansira Općina Kakanj kroz Program utroška namjenskih sredstava za zaštitu okoline. Cilj projekta je smanjiti zagađenje uzrokovano radom mini-kotlovnica. U realizaciju ovog projekta već je uloženo 1.500.000 KM. Projekat je nekoliko godina čekao na dovršetak.

Realizirane su i aktivnosti na širenju mreže daljinskog grijanja na području MZ Papratnica, a u toku su aktivnosti na izradi projektno-tehničke dokumentacije za proširenje sistema daljinskog grijanja u nekoliko naselja.

## **Postizanje standarda energetske efikasnosti kroz utopljanje objekata**

U proteklom periodu Općina Kakanj je realizirala brojne mjere čiji je cilj postizanje standarda energetske efikasnosti. Jedna od aktivnosti je i toplifikacija objekata kako bi se u konačnici dobile uštede energije. Nakon utopljanja temeljito obnovljenog Doma kulture, te izdvajanja 60.000 KM sredstava za obnovu fasade i utopljanje zgrade Općinskog suda, na području Kakanja su realizirane i aktivnosti na utopljanju zgrade područne škole u naselju Termoelektrana, te aktivnosti na utopljanju još nekoliko objekata.

## **Evropska sedmica mobilnosti i Evropski dan bez automobila u Kakanju u znaku završnih radova na izgradnji biciklističke staze**

Evropska sedmice mobilnosti, koja se obilježava u periodu od 16. do 22. septembra, u Kakanju je protekla u znaku završnih radova na izgradnji biciklističke staze u gradskoj jezgri Kakanja i uređenja prostora oko staze. Izvršeno je postavljanje metalne ograde, te sadnja žive ograde. U budućem periodu Općina Kakanj će izvršiti postavljanje klupa uz stazu, dodatno osvijetliti pojedine dijelove staze, te urediti prostore za parkiranje dvotočkaša. Izgradnjom biciklističke staze Kakanj se pridružuje inicijativi evropskih gradova da se u gradskim zonama što više koristi bicikl kao prevozno sredstvo sa ciljem poboljšanja ekološke slike, smanjenja potrošnje goriva, smanjenja saobraćajnih gužvi, te promoviranja zdravog načina življenja.

Općina Kakanj planira i nastavak izgradnje biciklističke staze, i to ispod Mosta mladih, dalje preko Mila, pa sve do stadiona FK "Mladost" Doboje.

## **U toku aktivnosti na formiranju ekološke biblioteke**

Opsežne ekološke aktivnosti koje realizira Općina Kakanj proširene su sa još jednim novitetom – formiranjem ekološke biblioteke. Aktivnosti na formiranju ekološke biblioteke realizira Gradska biblioteka Kakanj, a novčana sredstava za ovu svrhu u iznosu od 3.000 KM osigurala je Općina Kakanj.

## **Realiziran projekat sadnje drveća i ukrasnog grmlja u Ulici branilaca**

Općina Kakanj je realizirala projekat sadnje drveća i ukrasnog grmlja uz gradsku saobraćajnicu u Ulici branilaca. Radi se o projektu čiji je cilj rekultivacija obale ispod naselja Varda, sprečavanje nepovoljnih utjecaja rudničke jalovine u obalnom pojasu, te poboljšanje ekološke i estetske slike gradske jezgre Kakanja. Izvršeno je čišćenje površine od ostataka smeća i divljeg rastinja, mašinski iskop oštećenog materijala sa odvozom na deponiju, grubo škarpiranje terena, razastiranje zemlje odgovarajućeg kvaliteta, sadnja 40 drvodrednih i 20 crnogoričnih stabala, te 900 ukrasnih grmova. Projekat su finansirali Federalni fond za zaštitu okoliša iznosom od 20.000 KM i Općina Kakanj čije učešće iznosi 5.000 KM.

## **Uspješno realizirano nekoliko volonterskih ekoloških akcija**

Općina Kakanj se pridružila organizaciji akcije “Let's do it-očistimo zemlju za jedan dan” koja je održana 7. maja 2014. godine. Akcija je rezultirala vrhunskim uspjehom obzirom da je prikupljeno 100 m<sup>3</sup> otpada.

25. oktobra 2014. godine, u Kaknju je, kao i u drugim gradovima BiH, realizirana velika volonterska ekološka akcija „Let's Do It – milion sadnica za 1 dan”. U akciji koja je realizirana na području Slapne Gore učestvovalo je 88 volontera. Izvršena je sadnja 5.000 sadnica smrče na površini od 2 hektara.

U organizaciji Humanitarne organizacije “World Vision BiH” i Općine Kakanj, sredinom novembra u Kaknju je, u blizini naselja Brus, izvršeno pošumljavanje velike površine goleti. U akciji su učestvovali aktivisti “World Vision”-a, predstavnici i službenici Općine Kakanj, predstavnici Centra za socijalni rad Kakanj, vatrogasci Profesionalne vatrogasne jedinice Kakanj, predstavnici škola koje su korisnici donacija pomenute humanitarne organizacije, učenici škola kojima je u proteklom periodu pomagao “World Vision BiH”, predstavnici nevladinih organizacija i udruženja poljoprivrednika iz Kaknja, te drugi partneri i korisnici pomoći HO “World Vision BiH”.

## **OPĆINSKO VIJEĆE**

### **Na sjednicama Općinskog vijeća zabilježen visok nivo konsenzusa o pitanjima koja su od općeg interesa za građane Kaknja**

U periodu 1. januar – 30. novembar 2014. godine, Općinsko vijeće Kakanj je na 11 sjednica razmatralo 317 tačaka dnevnog reda. Na programe i planove odnosile su se 23 tačke, a 6 na Budžet Općine Kakanj i izmjene Budžeta. Na vijećničkim klupama našlo se 95 odluka i 116 rješenja. Usvojeno je 40 zaključaka, 42 izvještaja, 18 informacija...

Na sjednicama Općinskog vijeća Kakanj zabilježen je visok nivo konsenzusa o pitanjima koja su od općeg interesa za građane Kaknja, što znači da su interesi Kaknja stavljani iznad političke pripadnosti, te pripadnosti poziciji ili opoziciji, a ovakva praksa posebno je bila evidentna tokom nastojanja da se ispravi historijska nepravda na način da Kakanj dobije dio prihoda koje svojim radom ostvaruje Termoelektrana Kakanj. Kakanj je svijetli primjer u pogledu odnosa svih vijećnika prema interesima grada Kaknja i svih njegovih građana, dok u nekim drugim sredinama građani ispaštaju zbog izostanka međusobnog uvažavanja, saradnje, dijaloga i konsenzusa u tijelima koja donose važne odluke.

## **STAMBENO ZBRINJAVANJE I UVOĐENJE REDA U OBLASTI GRADNJE**

### **Uvođenje reda u oblasti urbanizma i gradnje , razvoj koncepta socijalnog stanovanja, stambeno zbrinjavanje**

U okviru aktivnosti na uvođenju reda u oblasti urbanizma i gradnje, Odsjek za inspekcije izvršio je tokom 2014. godine uklanjanje 9 objekata koji su izgrađeni ili postavljeni na zemljištu u državnom vlasništvu bez odobrenja za građenje. Uklonjena su i 3 objekta na zemljištu u privatnom vlasništvu koja su predstavljala opasnost za ljude, imovinu i materijalna dobra usljed dotrajalosti.

Nakon decenija izbjegavanja suočavanja sa problemima bespravne gradnje, 2014. godinu, ali i prethodnu 2013. godinu, u Kaknju su obilježile aktivnosti na uvođenju reda u oblasti gradnje. Brojne nagomilane probleme bespravne gradnje nije moguće riješiti u kratkom periodu. No, postoji odlučnost i sistemski pristup. Problem se rješava kroz legalizaciju bespravno izgrađenih objekata tamo gdje je moguća legalizacija u skladu sa zakonskim

propisima, rušenjem objekata koje nije moguće legalizirati, te izgradnjom stambenih objekata za socijalno ugrožene Rome uz pomoć Ministarstva za ljudska prava i izbjeglice BiH i donatora.

U naselju Varda aktuelni su radovi na izgradnji stambenog objekta sa 4 stambene jedinice u koje će biti smještene socijalno ugrožene porodice Roma. Radove finansira Ministarstvo za ljudska prava i izbjeglice BiH, dok je Općina Kakanj implementator projekta. Vrijednost ugovora iznosi **128.436,57 KM**. Ova 4 stana će koristiti **Ramić Hašim, Ramić Avdo, Agić Juso i Ramić Džemal**, svi trenutno nastanjeni na Vardi. Stanovi će korisnicima biti dodijeljeni na korištenje, dok će vlasnik stanova biti Općina Kakanj. U svrhu stambenog zbrinjavanja socijalno ugroženih porodica Roma početkom 2014. godine je izgrađena i useljena zgrada sa 12 stanova (**363.216,85 KM**).

U Kaknju će uskoro početi i izgradnja još 8 stambenih jedinica za socijalno ugrožene porodice Roma. Izgradnju će finansirati Humanitarna organizacija "Hilfswerk" Austrija. **Izgradnjom novih stambenih jedinica stvaraju se preduslovi za rušenje bespravno izgrađenih i za život neuslovnih objekata u naselju Varda čime ovo naselje korak po korak poprima novi izgled.**

U Ulici 311. lahke brigade početkom decembra su započeli radovi na sanaciji i dogradnji stambenih objekata u kojima žive socijalno ugrožene višečlane porodice koje su tokom ratnih dejstava imale status raseljenih osoba, a danas su svi članovi ovih porodica nezaposleni. Radi se o objektu u vlasništvu Rizve Beganovića čija porodica broji 11 članova, od koji su 3 člana maloljetna djeca, objektu Delije Beganovića čija porodica broji 10 članova, od koji su polovina maloljetne osobe, te objektu Sulje Beganovića čija porodica broji 4 člana. Nakon ovih radova bit će realizirani i radovi na izgradnji i sanaciji još tri kuće. Husić Salko i njegova šestočlana porodica koja trenutno ima status podstanara dobit će novu kuću u naselju Varda na zemljištu koje je dodijelila Općina Kakanj. Bit će izvršena i sanacija stambenog objekta Zahida Kadrića koji stanuje u Šepercima (Poljani), a novu kuću će dobiti i Sabahudin Kadrić koji stanuje u istom naselju. Radove finansira Ministarstvo raseljenih osoba i izbjeglica F BiH.

U blizini Autobuske stanice Kakanj bilježemo radove na izgradnji kuće za Aišu Jašarspahić koja je tokom majskih poplava ostala bez svog doma. Aiši Jašarspahić je u svrhu pomoći za izgradnju stambenog objekta dodijeljeno 23.250 KM. Osim Aiše Jašarspahić, u svrhu pomoći za izgradnju stambenih objekata vlasnicima sa totalnom štetom, po 23.250 KM dodijeljeno je i **Selimu Kariću, Šidi Rojo i Sadiki Tursum, Ademu Habiboviću** je dodijeljeno 27.000 KM, dok je **Čajo Namiru** dodijeljeno 39.750,00 KM.

Kakanjska firma "DSM TRADE" je finansirala izgradnju kuće u Hausovićima za dvije sestre Arnaut koje su bez doma ostale tokom prirodne nesreće iz maja 2014. godine.

## **IMOVINSKO-PRAVNI I GEODETSKI POSLOVI, KATASTAR NEKRETNINA**

### **3.960 promjena na parcelama, 1.018 izdatih prepisa posjedovnih listova, 5 novih digitaliziranih katastarskih općina...**

Tokom 2014. godine kakanjski geometri su imali pune ruke posla. Prema izvještaju Odsjeka za geodetske poslove i katastar nekretnina, geometri su realizirali **451** ostavinsko rješenje na osnovu ostavinskih postupaka sudova, provedena su **292** ugovora koji su notarski obrađeni i dostavljeni, te rješenja sudova, pravobranilaštva i Općinskog vijeća, izvršeno je **3.960** promjena na parcelama...

Odsjek je izdao **1.109** uvjerenja o posjedovanju nekretnina po raznim osnovama (socijalna pomoć, zdravstveno osiguranje, dječiji doplatak...). Zabilježeno je i **1.018** izdatih prepisa posjedovnih listova, te **805** izdatih kopija katastarskog plana.

Tokom 2014. godine izvršena je digitalizacija katastarskih općina Papratnica, Čatići, Kakanj, Vukanovići i Slapnica što uz prethodno digitaliziranih 9 iznosi ukupno 14 digitaliziranih katastarskih općina od 40 koliko ih ima u Kaknju. Općina Kakanj je pristupila projektu digitalizacije katastarskih općina koji se ogleda u uspostavi programa “**Katastar.ba**“. Za ovu svrhu nabavljeno je 5 računara. Program je uspostavila Federalna geodetska uprava.

Kakanjski geometri su zajedno sa geolozima tokom majske prirodne nesreće koordinirali aktivnosti koje su bile usmjerene na borbu sa klizištima.

### **14 predmeta eksproprijacije, 18 predmeta dodjele zemljišta radi gradnje, 2 stana vlasnicima vraćena u posjed...**

U Odsjeku za imovinsko-pravne i stambene poslove Općine Kakanj tokom 2014. godine obrađeno je 14 predmeta eksproprijacije, te po jedan predmet deeksproprijacije i utvrđivanja javnog interesa. Obraden je 71 predmet dodjele zemljišta u Barama iseljenim mještanima sela Zlokuće, sačinjeno je 35 rješenja o izuzimanju zemljišta u Zlokućama iseljenim mještanima, obrađeno je 18 predmeta dodjele zemljišta radi gradnje i 6 predmeta o gubitku prava korištenja zemljišta radi gradnje.

Obraden je 9 zahtjeva za vraćanje imovine u vlasništvu građana i 2 zaključka o prinudnom izvršavanju prvostepenih rješenja.

Zaključena su 3 nova ugovora o upravljanju stambenim zgradama. Od stupanja na snagu kantonalnih odredbi koje se odnose na sklapanje ugovora sa upraviteljima do danas u Kaknju su zaključeni ugovori sa upraviteljima za 92 zgrade.

Tokom 2014. godine dva stana su vraćena vlasnicima u posjed. Zaključeno je 12 ugovora o korištenju stanova za socijalno ugrožene porodice Roma. Provedene su 4 aktivnosti na rušenju neuslovnih objekata u naselju Varda radi obezbjeđenja lokacija za gradnju stanova za Rome.

## **INSPEKCIJE**

### **Iz bilježnica općinskih inspektora**

Tokom 2014. godine Odsjek za inspekcije Općine Kakanj obavio je ukupno 572 inspekcijska pregleda i 294 kontrolna inspekcijska pregleda. Poduzeto je ukupno 435 preventivnih i represivnih mjera, te je uručeno ukupno 76 prekršajnih naloga. U saradnji sa Policijskom stanicom Kakanj, Odsjek za inspekcije je u 2014. godini oduzeo veću količinu prehrambenih proizvoda (margarin, kreme, sredstva za higijenu, čokoladni proizvodi i sl) bez valjane dokumentacije i isteklog roka upotrebe.

U toku predizborne kampanje uspješno je proveden poseban plan aktivnosti sa ciljem onemogućavanja plakatiranja na mjestima koja nisu namijenjena za tu svrhu. Ova akcija je ocijenjena uspješnom jer u Kaknju nije bilo, kao u nekim drugim gradovima, masovnog bespravnog lijepljenja predizbornih plakata. Zabilježeno je samo nekoliko slučajeva kada su plakatiranje izvršili kandidati za izbore koji imaju prebivalište u drugim općinama.

Odsjek za inspekcije Općine Kakanj vrši redovne kontrole posjedovanja odobrenja za rad kod prodavača tekstilne i druge robe na prostoru tzv. tekstilne pijace koja se nalazi na poligonu iznad Osnovne škole “Hamdija Kreševljaković” u Kaknju. Na ovom prostoru subotom, ali i drugim danima, prodaju vrši oko 80 prodavača, od čega 20 iz Kaknja, a 60 iz drugih općina, najviše iz Visokog i Zenice.

Općinski eko-redari i Odsjek za inspekcije kontinuirano realiziraju akciju sprečavanja lijepljenja plakata po stubovima javne rasvjete, te po stablima drveća. Činjenica da u Kaknju nema masovnog lijepljenja plakata po stubovima, te stablima drveća pokazuje napredak u jačanju svijesti građana o čistoći i urednosti naselja u kojem žive.

Proteklih nekoliko mjeseci sanitarna inspekcija realizira intenzivne aktivnosti na provjerama kvaliteta i ispravnosti vode za piće u svim kakanjskim osnovnim i srednjim školama.

Sa ciljem jačanja komunikacije i saradnje sa građanima, Odsjek za inspekcije Općine Kakanj je omogućio da se i u pisanom obliku dostavljaju anonimne prijave građana. Prijave se mogu dostaviti ubacivanjem u sanduče koje je postavljeno na ulazu u šalter-salu. Anonimne prijave se mogu dostaviti i putem alata dvosmjerne komunikacije Općine Kakanj sa građanima (e-mail, Facebook profil "Općina Kakanj", komentari na vijesti objavljene na službenoj web-stranici).

## CIVILNA ZAŠTITA

### **Zahvaljujući brzom i blagovremenoj intervenciji Kakanj tokom prirodne nesreće iz maja 2014. godine Kakanj nije postao grad-slučaj**

Kakanj je bio jedna od prvih općina koje su donijele odluku o proglašenju stanja prirodne nesreće. Od momenta proglašenja stanja prirodne nesreće počelo je kontinuirano zasijedanje Općinskog štaba civilne zaštite, konstantno prisustvo na terenu članova Štaba, te koordinacija opsežnih aktivnosti kako bi se zaštitili i spasili ljudski životi, te materijalna dobra. Angažirane su sve raspoložive snage i mehanizacije, a u borbu sa poplavama i klizištima uključili su se i građani. Vođena je odlučna borba da se spase ljudi, vršene su evakuacije i zbrinjavanje ugroženog stanovništva (Hotel "Premium" i druga mjesta), postavljanjem nasipa branjena su naselja, putevi, mostovi, brzom reakcijom saobraćajno je deblokirano nekoliko naselja, realizirana je velika volonterska akcije "Svi lopate u ruke", provedene su opsežne humanitarne aktivnosti, radi dostavljanja hrane u selo Sebinje angažiran je helikopter...

Neposredno nakon prirodne nesreće, Komisija za procjenu šteta od prirodnih i drugih nesreća formirala je 8 podkomisija koje su izvršile obilazak terena po zahtjevima građana (1.112 zahtjeva) i izvršile procjenu štete na imovini građana i javnoj infrastrukturi u visini od **28.571.586,03 KM**.

### **Sanacija posljedica prirodne nesreće**

Obzirom na činjenicu da su Kaknju sa viših nivoa vlasti dodijeljena vrlo skromna i apsolutno nedostatna sredstva za sanaciju posljedica prirodne nesreće, u ukupan fond iz kojeg će se sanirati posljedice prirodne nesreće Općina Kakanj je usmjerila više od 100.000 KM vlastitih sredstava. Naglašavamo činjenicu da je Općina Kakanj tokom borbe sa poplavama i klizištima utrošila gotovo **polu miliona KM vlastitih sredstava**.

U proteklom periodu, u okviru aktivnosti na sanaciji posljedica prirodne nesreće iz maja tekuće godine, izvršeno je čišćenje korita rijeka na području Kaknja, izvršena je stabilizacija brojnih klizišta, izvršena je dodjela cijevi stanovništvu u svrhu odvodnje voda iz klizištima ugroženih zona, izvršene su brojne popravke puteva...

Realizirani su radovi na sanaciji i nasipanju puta u Desetniku (gornji dio sela) koji je oštećen usljed elementarne nepogode. Radi se o projektu ukupne vrijednosti od 15.000 KM. U naselju Zgošća su realizirani radovi na izgradnji potpornog zida dužine 22 m. Vrijednost radova koje je finansirala Humanitarna organizacija "World Vision BiH" iznosi 5.000 KM. Na putu Kakanj-Zagrađe također je izgrađen potporni zid. I ove radove čija je

ukupna vrijednost 10.400 KM finansirao je "World Vision". Realizirani su i radovi na sanaciji klizišta i lokalnog puta u Bijelim Vodama, kod kuće Mehmedalije Hodžića. Izvršena je i izgradnja potpornih zidova u Dubovom Brdu na putu Donji Kakanj – Kondžilo. Radi se o projektu ukupne vrijednosti 50.000 KM. U Hausovićima je realiziran projekat odvodnje oborinskih i podzemnih voda. U blizini Mosta šehida izvršena je sanacija kanalizacionog kolektora koji je oštećen tokom majskih nedaća. Realizirani su radovi na sanaciji dijela kanalizacione mreže u naselju Pope koji je oštećen u prirodnoj nesreći. Vrijednost radova iznosi 5.200 KM, a finansijer radova je "World Vision BiH". Realiziran je i veliki broj manjih intervencija kroz Program redovnog i vanrednog održavanja lokalnih i nerazvrstanih puteva. Realizirani su i brojni drugi projekti.

Počeli su radovi na čišćenju nanosa iz korita rijeke Bosne na nekoliko lokacija, a uskoro bi trebali početi i radovi na uređenju lijeve obale rijeke Bosne nizvodno od Mosta mladih.

Općina Kakanj je, uz angažiranje svojih vlastitih sredstava u vrijeme prirodne nesreće i poslije kada je trebalo sanirati prioritete, potražila i pomoć humanitarnih organizacija. Na poziv za pomoć javila se Humanitarna organizacija "World Vision BiH" koja je za 589 porodica iz Kakanja dodijelila sjemenski materijal i mineralno đubrivo. Ova humanitarna organizacije je u partnerstvu sa Općinom Kakanj realizirala i dodjelu ovaca i koza i drugog stočnog fonda, te stočne hrane i sijena domaćinstvima kod kojih su zabilježene štete u poljoprivredi.

### **Profesionalna vatrogasna jedinica Kakanj zabilježila 166 intervencija**

U 2014. godini Profesionalna vatrogasna jedinica Kakanj je imala ukupno 166 intervencija. Od ove ukupne brojke, 22 intervencije su se odnosile na požare koji su se desili na stambenim objektima, 6 na požare na pomoćnim objektima, 10 slučajeva se odnosilo na požare u dimnjacima, 46 puta je intervenirano u slučajevima šumskih požara, 13 intervencija se odnosilo na poplave, 6 puta je intervenirano u slučajevima požara na motornim vozilima, te u slučajevima saobraćajnih nesreća, izvršeno je 27 tehničkih intervencija (otključavanje stanova, prevoz vode i sapiranje), a 36 intervencija se odnosilo na zapaljeno sijeno, gume i kontejnere.

U odnosu na 2012. godinu kada je broj intervencija na godišnjem nivou iznosio 522, te 2013. godinu kada je broj intervencija iznosio 216, u 2014. godini bilježimo smanjenje broja intervencija obzirom da je ukupna brojka 166.

To je rezultat preventivnih aktivnosti, medijskog oglašavanja i apeliranja, porasta stepena svijesti stanovništva o opasnostima, ali i akcije koja se realizirala sa ciljem otkrivanja i kažnjavanja osoba koje su nesavjesnim paljenjem korova na svojim njivama izazivale šumske požare.

Služba civilne zaštite Općine Kakanj u saradnji sa Federalnom upravom civilne zaštite, Kantonalnom upravom CZ-a i Policijskom stanicom Kakanj vrši redovno obilježavanje i uklanjanje pronađenih zaostalih neeksplodiranih ubojnih sredstava (NUS). U toku 2014. godine prikupljeno je i predato Timu za uništavanje 23 komada NUS-a i 210 komada sitne municije.

## **POMOĆ BORAČKIM KATEGORIJAMA I OBILJEŽAVANJE ZNAČAJNIH DATUMA**

Za jednokratne novčane pomoći boračkim populacijama isplaćen je novčani iznos od **109.325 KM**. Za rad boračkih organizacija izdvojeno je **105.378,93 KM**. Svi značajni datumi iz perioda Odbrambeno-oslobodilačkog rata 1992-1995. su dostojanstveno obilježeni.

23. maja 2014. godine, na Dan kakanjskih dobrovoljaca "Misoča 92", u Kaknju je organizirano predstavljanje Monografije Trećeg korpusa Armije R BiH. Monografiju su predstavili ratni komandant Trećeg korpusa Armije R BiH Sakib Mahmuljin i drugi visoki oficiri Armije.

Općina Kakanj je pružila i pomoć pri formiranju Saveza udruženja boračkih organizacija općine Kakanj (SUBOK) u čiji sastav je ušlo 10 boračkih udruženja. Uz pomoć Općine Kakanj, SUBOK je izvršio adaptaciju svojih prostorija koje se nalaze u ulici Alije Izetbegovića (soliter 1) čime su u značajnoj mjeri poboljšani uslovi za rad Saveza.

Općina Kakanj finansira i izradu Monografije "Kakanj u odbrani od agresije".

## **DJECA, MLADI, SPORT, KULTURA**

### **Polu miliona KM ulaganja u sport**

Transfer za sport u 2014. godini iznosio je **310.000 KM**, dok je za subvencije troškova za korištenje sportskih objekata izdvojeno **150.000 KM**.

Sportski klubovi i općenito takmičari iz Kaknja su ostvarili vrhunske rezultate u 2014. godini. Amel Tuka iz Kaknja proglašen je jednim od trojice najuspješnijih sportista BiH u 2014. godini.

### **Sa radom počela muzička škola i škola baleta, u Kaknju uskoro i visokoškolska ustanova**

Ono o čemu se decenijama maštalo u Kaknju – gradu muzičkih talenata postalo je stvarnost. Početkom septembra tekuće godine sa radom je počela muzička škola u Kaknju, a rezultati rada ove obrazovne ustanove koja je novitet u našem gradu već su vidljivi. U prvi razred muzičke škole upisani su, prema pedagoškim pravilima, učenici koji u školskoj 2014/15. godini pohađaju četvrti razred redovne osnovne škole. Već sljedeće godine, nakon upisa nove generacije, muzička škola će imati prvi i drugi razred i tako će broj odjeljenja i učenika rasti iz godine u godinu. U kakanjskoj muzičkoj školi učenici su raspoređeni u 5 grupa i to: odsjek za klavir, odsjek za harmoniku, odsjek za gitaru, gudači i duvači.

Početkom septembra u Kaknju je sa radom počela i škola baleta. Nastup polaznika škole baleta na svečanoj akademiji povodom Dana državnosti BiH pokazao je da Kakanj, uz muzičke, dramske, sportske, likovne i druge talente, ima i talente u baletskoj plesnoj formi.

Nakon što je u proteklom periodu izgrađen novi Dom kulture, nova zgrada Policijske stanice Kakanj, Društveni dom u Čatićima, Gradska galerija likovne umjetnosti, biciklistička staza, te nakon formiranja muzičke škole, adaptacije zgrade Centra za socijalni rad i Općinskog suda, Kakanj će, uz hemodijalizni centar, novu zgradu Općine i gradski muzej, uskoro dobiti i **visokoškolsku ustanovu** tj. fakultet sa više akademskih usmjerenja.

### **Organizirane radionice za djecu, počinje izgradnja sportskog poligona i dječijeg igrališta u gradskoj jezgri, na vrijeme isplaćene stipendije...**

U Omladinskom centru Kakanj organiziran je serijal dječijih kreativnih radionica u organizaciji Udruženja građana "Alternative" Kakanj uz finansijsku podršku Općine Kakanj.

Kakanjski mališani imaju priliku da se druže i u okviru projekta pod nazivom "Kutak za djecu" koji je namijenjen djeci čije su porodice pogođene prirodnom nesrećom iz maja tekuće godine. "Kutak za djecu" kojeg

organizira Humanitarna organizacija “World Vision BiH” – Ured u Zenici se nalazi u prizemlju solitera 3. Ovaj prostor obezbijedila je Općina Kakanj.

Pored kreativnih radionica u Omladinskom centru i “Kutka za djecu”, u Kaknju se realizira još jedna aktivnost koja je namijenjena kakanjskim mališanima. U Omladinskom centru Kakanj srijedom se održavaju radionice za djecu sa posebnim potrebama. Organizator radionica je Udruženje roditelja i djece sa posebnim potrebama “Proljeće” Kakanj” uz finansijsku podršku Općine Kakanj.

Općina Kakanj realizira i aktivnosti na izgradnji dječijih igrališta. U naselju Zgošća u toku su aktivnosti na izgradnji eko-parka i igrališta. Radove ukupne vrijednosti **46.893,54 KM** finansira Općina Kakanj.

U gradskoj jezgi Kaknja u narednoj godini bit će izgrađen sportski poligon i dječije igralište. Izgradnju će finansirati Tvornica cementa Kakanj donacijom od **55.000 KM**, a značajna sredstva će izdvojiti i Općina Kakanj.

U osvrtu na 2014. godinu izdvajamo i aktivnosti Općine Kakanj u oblasti socijalne zaštite djece i mladih. Djeci koja pohađaju osnovnu školu i čija je porodica u teškoj socijalnoj situaciji Općina Kakanj osigurava novac za školsku uzinu. Visina naknade iznosi 1 KM po danu, 22 KM mjesečno po djetetu, a isplaćuje se za školsku godinu. Putem Centra za socijalni rad Kakanj, isplaćuju se jednokratne novčane pomoći za porođaj i opremu novorođenog djeteta.

Općina Kakanj izvršava svoje obaveze (14.400 KM) prema Dnevnom centru za djecu i odrasle s posebnim potrebama u Dobrinju (Visoko) koji brine o pomenutoj populaciji sa područja nekoliko općina. Općinskim budžetskim sredstvima sufinansira se (6.914 KM) i implementacija projekta “Centar za rano podsticanje razvoja i ranu intervenciju za djecu s posebnim potrebama” u Zenici.

Općina Kakanj je redovno, od momenta okončanja konkursne procedure, mjesec za mjesec, isplaćivala općinske stipendije za učenike srednjih škola (izdvojeno **15.000 KM**, 50 stipendija) i studente (izdvojeno **137.000 KM**, 167 stipendija) . Redovno su izvršavane i sve obaveze u pogledu sredstava za 30 korisnika općinskog programa stimulativnog zapošljavanja pripravnika.

Iz Budžeta Općine Kakanj izdvajaju se i sredstva (209.000 KM) u svrhu isplata povlastica za prevoz učenika srednjih škola i studenata. Povlastice za prevoz iznose 100 % i 50 % ovisno od kategorije stanovništva kojoj korisnik pripada.

U 2014. godini učenicima generacije uz prigodne poklone isplaćeno je po 200 KM stimulacije (izdvojeno ukupno 2.500 KM).

Općina Kakanj je finansijski podržala projekat “Žogarije-loptarije” u kojem su učestvovala i kakanjske osnovne škole. Općina je finansirala i odlazak učenika OŠ “Mula Mustafa Bašeskija” Kakanj na finalno takmičenje “Žogarije-loptarije” koje je održano u Austriji. Finansiran je i prevoz djece iz Kaknja na “Kid's festival” koji se održava u Sarajevu.

### **Kulturno-sportska manifestacija “Kakanjski dani” privukla veliki broj građana Kaknja i susjednih općina**

U okviru Kulturno-sportske manifestacije “Kakanjski dani” koja je održana početkom augusta 2014. godine, upriličeni su brojni interesantni, atraktivni i nesvakidašnji programski sadržaji. Akcenat je stavljen na kvalitet sadržaja, te raznovrsnost i prilagođenost svim uzrastima i generacijama. U muzičkom dijelu manifestacije nastupili su grupa “Crvena jabuka”, Ilma Karahmet, Mirza Selimović, kakanjske zvijezde...

## Otvorena Gradska galerija likovne umjetnosti, Kakanj će uskoro dobiti i muzej

Početak augusta u Kaknju je otvorena Gradska galerija likovne umjetnosti. Osim Galerije, Kakanj će uskoro dobiti i muzej. Jedan od ciljeva gradnje muzeja je u naš grad vratiti kakanjske artefakte i znamenja koja se čuvaju u drugim gradovima. Posebna pažnja u Kaknju se posvećuje uređenju nekropole stećaka i drugim kulturno-historijskim znamenitostima.

Nakon uređenja nekropole stećaka na Ivničko-zagradskoj gradini, počele su i aktivnosti na uređenju nekropole stećaka u naseljenom mjestu Nažbilj, te uređenju starog muslimanskog mezarja iz Osmanskog perioda koje se nalazi u Lučanima.

## ADMINISTRACIJA

### Općina Kakanj razvija koncept savremenih administracija koji kaže “Putuju podaci, a ne građani”

U Centru za pružanje usluga u 2014. godini zabilježeno je **oko 90.000 posjeta**. Izvršene su **66.573 ovjere** potpisa, rukopisa i prepisa, te autentičnosti rukopisa ili potpisa na punomoći, zaprimljeno je 9.567 zahtjeva građana, izdato je **19.710 izvoda** i uvjerenja iz matičnih evidencija, izvršeno je **28.000 elektronskih provjera podataka** građana u matičnim knjigama... Tokom 2014. godine na području općine Kakanj obavljena su **224 vjenčanja**.

Nakon uvođenja prakse izdavanja rodni listova i drugih izvoda iz matičnih knjiga bez roka važenja, te nakon omogućavanja da se u Kaknju mogu dobiti rodni listovi i drugi izvodi iz matičnih knjiga bez obzira što je osoba rođena ili je zasnova brak u nekoj drugoj općini, uveden je još jedan novitet i administrativna olakšica. Umjesto ranije prakse po kojoj su novorođenčad upisivana u matične knjige rođenih u mjestu rođenja, sada će se upis u matične knjige rođenih vršiti prema prebivalištu majke. Dakle, sva djeca koja se rode u Kantonalnoj bolnici Zenici ili u nekom drugom gradu ili općini, bit će upisana u matičnu knjigu rođenih u Kaknju ukoliko majka novorođenčeta ima prebivalište na području općine Kakanj. Uvedene su i administrativne olakšice u pogledu upisa u matične knjige umrlih. Prema novoj praksi umrle osobe će se upisivati u matičnu knjigu umrlih prema mjestu svoga prebivališta koje su imale pred smrt. Prema ranijoj praksi, umrle osobe su upisivane u matičnu knjigu umrlih u općini u kojoj je smrt nastupila, pa su, ilustracija radi, porodice umrlih iz Kaknja morale po neophodnu dokumentaciju za umrlo lice putovati npr. do Zenice ako je član njihove porodice umro u Kantonalnoj bolnici Zenica ili do Tešnja ukoliko je smrt nastupila u Općoj bolnici Tešanj.

### U toku izgradnja nove zgrade Općine Kakanj

U Ulici branilaca u Kaknju odvijaju se intenzivni radovi na izgradnji zgrade Općine Kakanj. Nakon decenija pružanja usluga građanima u objektu koji je vlasništvo RMU Kakanj, nakon brojnih opravdanih sugestija i kritika da stara i trošna zgrada zbog arhitektonskih barijera ne pruža mogućnost da se građanima s posebnim potrebama omogući pristup svim službama koje pružaju usluge, donesena je odluka o izgradnji nove zgrade Općine Kakanj. Vrijednost Ugovora o izvođenju grubih građevinskih radova na izgradnji zgrade Općine Kakanj u prvoj fazi iznosi **2.002.755 KM**. Izvođač radova je Konzorcij “ITC” Zenica i “Trgošped” Kakanj. Radovi se finansiraju iz sredstava ostvarenih prodajom poslovnih prostora koji su bili u vlasništvu Općine Kakanj. Ova sredstva mogu biti utrošena samo za izgradnju novih objekata u vlasništvu Općine. U budućoj zgradi planirane su podrumске prostorije sa 52 mjesta za parkiranje. U suterenu će biti smještena šalter-sala, sala za vjenčanja i šest poslovnih prostora. Na tri etaže će biti radni prostori za općinske službe, sale za sastanke, sala za sjednice Općinskog vijeća, a objekat će sadržavati i veliki hol.

## DVOSMJERNA KOMUNIKACIJA

### **Općina Kakanj svakodnevno ostvaruje i kontinuirano jača dvosmjernu komunikaciju sa građanima**

U domeni razvoja participativnih mehanizama, pokrenuta je službena web-stranica koja se redovno ažurira, otvorena je opcija komentiranja vijesti na službenoj web-stranici, redovno se na adrese tridesetak medijskih kuća i novinara šalju informacije iz Općine, sa građanima se svakodnevno komunicira putem Facebook-profila Općine Kakanj... Cilj je da se svakodnevno ostvaruje i kontinuirano jača dvosmjerna komunikacija sa građanima.

Općina Kakanj sa ponosom ističe i svoj prestižni status „Beacon (svjetionik) općine“ kojeg je Kaknju dodijelio, u petom krugu „Beacon scheme“, koja ima takmičarski karakter, Savez općina i gradova F BiH za oblast „Položaj i uloga mjesnih zajednica u jedinicama lokalne samouprave“.

Švicarska certifikacijska kuća SGS (Société Générale de Surveillance SA), sa sjedištem u Ženevi, dodijelila je Općini Kakanj certifikat **ISO 9001:2008** za aktivnost “Realizacija lokalne uprave i samouprave”. Općina Kakanj je tokom 2014. godine uspješno prošla i procese recertifikacije.

Općina Kakanj je sa zadovoljstvom prihvatila prijedlog da učestvuje u projektu “Participativno budžetiranje”. Cilj projekta kojeg realizira Humanitarna organizacija “World Vision BIH” je osnažiti lokalne nevladine organizacije, organizacije civilnog društva i same građane da preuzmu važnu ulogu u odlučivanju o tome kako će javni novac biti utrošen na projekte i usluge u njihovoj zajednici.

### **Općina Kakanj pozvala građane da prijave slučajeve neprofesionalnog i neljubaznog ponašanja službenika na šalterima i drugih službenika Općine Kakanj**

Paralelno sa aktivnostima na uvođenju sistema izdavanja rodnih listova i drugih izvoda iz matičnih knjiga bez roka važenja, te istovremeno sa umrežavanjem koje omogućava građanima da rodni list i druge izvode iz matičnih knjiga dobiju u Kaknju bez obzira na mjesto rođenja, u Općini Kakanj se realiziraju i druge aktivnosti koje su usmjerene na povećanje stepena profesionalnosti i učinkovitosti rada u Centru za pružanje usluga građana, tj. u šalter-sali, kao i u područnim matičnim uredima. Aktivnosti su, između ostalog, usmjerene i na povećanje stepena profesionalnosti i ljubaznosti osoblja koje radi u šalter-salama. Održano je nekoliko sastanaka na kojima se razmatrala učinkovitost rada službenika na šalterima, upućeno je nekoliko smjernica za rad u budućem periodu, naglašena je potreba potpune primjene etičkog kodeksa, te je uvedena rotacija službenika koji rade na izdavanju izvoda iz matičnih knjiga... **Naglašeno je da svaki korisnik usluga koje pruža Općina Kakanj mora biti dočekan i ispraćen sa osmijehom i vrhunskom ljubaznošću u šalter-sali i svim općinskim službenim prostorijama.**

Građani su pozvani da prijave slučajeve neprofesionalnog i neljubaznog osoblja na šalterima, kao i drugih službenika Općine Kakanj.

